



Giovanni Netzer, intendant dad Origen e Vincent Augustin, anteriur deputà, han persequità la discussiun en il cussegl grond. FOTO F. ANDRY

Cultura vers constituziun

Il cussegl grond ha francà sia opiniun da sbursar dapli a favur da las pitgas culturalas

■ (anr/ac) L'appel dal cusseglier guvernativ Martin Jäger da resguardar ils princips costituziunals pertutgant la suveranità davart il preventiv chantunal nun ha nizzegià nagut. Il cussegl grond ha acceptà las pretenziuns da l'incumbensa Augustin cun 58 vers 44 vuschs. La cultura ha ina giada dapli fatschentà il cussegl grond. Las contribuziuns culturalas da 500 000 francs ad almain sis events culturalas en il chantun Grischun èn stadas tematisadas ina ulteriura giada suenter la debatta dal preventiv dal december passà. Il cuntegn da la debatta dad ier n'è betg sa differenzià fitg da las discussiuns en il plenum dal december. Ed igl è sa mussà cleramain, las instiuziuns onuradas dal parlament grischun cun dapli daners han prestà excellenta lavur da promoziun tar deputadas e deputads. Autras gruppas d'interess pon emprender insatge dals protagonistas dad Origen enfin il Teater da la citad da Cuir. Ils arguments costituziunals davart la suveranità sur dal preventiv e la plenipotenza dad elavurar tal n'han betg pudì impedir la decisiun da la maiorità dal cussegl a favur da l'incumbensa Augustin e da passa 70 cunsignataris. Ed era betg las empermischuns da la ministra da finanzas Barbara Janom Steiner da re-

sguardar la summa en il proxim preventiv ed en la planisaziun da finanzas. Il cussegl ha acceptà l'incumbensa da l'antieriur deputà Vincent Augustin cun 58 vers 44 vuschs ed uschia suttastritgà la veglia da conceder quel augment da 500 000 francs per ils onns suandants senza cumpensar la summa en auters lieus dal preventiv da l'uffizi da cultura.

Promoziun economica via cultura

Diversas deputadas e deputads sco Gaby Thomann (pld Surses) e Daniel Albertin (pcd Alvagni) han punctuà la valur da l'event cultural Origen per la economia regionala. Las investiziuns e la reclama sco er las piazzas da lavur èn vegnidas tematisadas ed han servì sco argument a favur da l'incumbensa Augustin. Ils votums han vinavant punctuà la necessitad da porscher ina tscherta perspectiva da planisar las finanzas. En quella direzziun èn divers votums nà da la Surselva sa drizzads. Uschia da la vart dad Ernst Sax (pcd Rueun) en connex cun Opera Viva che profitescha da l'augment da l'obulus cultural. Margrit Darms (pcd Foppa) da sia vart ha pleudentà il ferm signal da l'incumbensa Augustin cun passa 70 cunsignataris ed ha visà a la proxima revisiun da la nova

lescha da cultura. E ch'i saja necessari da surmuntar quella fasa e segirar a las instiuziuns definadas ils daners empermess. Il deputà Leo Jeker (pbd Tschintg Vitgs) ha accentuà sia voluntad da sustegnair la cultura. El ha pretendì ina giada dapli suatientscha nà da la cultura vers ils basegns economics. Votums critics da la cultura gist en connex cun la candidatura olimpica na dastgan en l'avegnir, tenor sia opiniun, betg pli esser in tema. «La cultura sto savair dalonder ch'ils daners vegnan.» Tant il cusseglier guvernativ Martin Jäger sco diversas deputadas e deputads han accentuà che l'incumbensa Augustin cuntrafetschia a la constituziun. Andreas Felix (pbd) ha discurre dad in putgà dad acceptar l'incumbensa Augustin e dad in fatal signal vers autras gruppas d'interess che savessian pretender il medem en l'avegnir ed uschia neutralisar las reglas da preschentar e decider il preventiv chantunal. La constituziun para betg dad esser tant impurtanta a la maiorità dal cussegl sco il confess a la cultura, tenor Leo Jeker ina bella cultura, ma betg critica.

La damonda costituziunala davart la suveranità sur dal preventiv è stada en la sumbriva da la debatta culturala.